

Hebanka Qul

Henîf Yûsif

Li ser bextê xwe yê reş
 Li ser textê xwe,
 textê zêrîn, textê darîn
 Textê amadekirinê bo çûna bêveger
 Dê bigirî, wek keçek qeyr e
 li ber deriyê pîrbûna xwe
 Û hêstir li çavan zuha bûne
 Li benda mirazê bêçar e û asê.
 Dê bigrî, yan binale,
 Wek nexweşekê li ber candanê,
 Ku ji heft ruhan yek tê nemaye,
 Wek birîndarek birînek reş
 Ku bi derdê xwe de ketiye,
 Hêvî birriye ji zivirandina li
 xwediyan.

Dê bigirî wek çiyakekê top lê ketî
 Wek erdek kelijî,
 Wek milletek derd pêketî
 Dê bigirî û ji hêrisa xwe, were xwar
 Wek xwedayekê, ku dihê xezebê
 Dê bigirî heta ku ji te dihê
 Guliyên li bayî bike
 Desmalê nexîne berîka xwe
 Hêstirên xwe bernede erdê,
 Da ku kes di gola rondikên te de
 Ji xwe re li masiyan negere.
 Ezê dîsa bihêmê, bigrî lê ji kerrkî ve,
 Bila kes li te, şah nebe û şar û şîretan
 li te neke

Ez di bextê te de me
 Mer û metê,
 Da ku tol û teresên demî,
 Bi dîtina bejna nazik perik nedin
 Û hêviyên min carek din nedizin
 Ew jî gunnehkariyek mezin e,
 Gava mirdar li te dicivin,
 Hilpekin di dora te re,
 Û xapandina mirazê min bikin.
 Dê binalîne wek dêwek navsal
 Wek çeçelek birsî
 Wek marek dûvqut û bêgunneh

Wek kurdek bêçar û bêmiraz
 Bêqedr û qîmet û belengaz
 Wek kurdek bêzar, dil bi kul û xêrxwaz
 Dê bigirî li ser textê zêrînê
 Bi çar pêpikan
 Dê bigirê ji ber kîna xwe
 Ji ber jîna xwe
 Dê bigirî azadiya min bigirî
 Bi kurtî bigirî, bi kurdî bigirî
 Bi heyvê re, bi daran re
 Bi kevr û kuçkên çol û beyaran re
 Bi Edûla Paşayê Milan re
 Bi Xezala rûsor ji maç û şerm û xeydan
 Bi Eysana ku bi fîstanê sorê melesî
 Diçe û dihê di nava gundan re.
 Dê here bi rêk û derban de
 Çoyê xwe bi dest xwe bike û
 'Ew bike pezê xwe
 Stirana xwe tew bike
 Hêj dirêj e şeva me,
 Dê here di demî de, wek zêrekê,
 Veşartî di bin erdekê de
 Ku kes bi ser hilnebe
 Ji navan û qederê
 Qedera Mîrê Misrê û sebra reş û zêrê

zer e

Hebanka qul bi lingê te ve ye
 Digere li nav malan,
 Parsa evîna reben dike
 Pîrsa evîndarên kujtî û mirdarên hiştî
 Ger tu av bayî,
 Ez da bibêjim: ji avan tu hêlî yî
 Ger tu xem bayî
 Ez da bibêjim: ji xeman tu bêlî yî
 Nazdariya jî dihêle ji heyva ku xwe di
 pişt ewran re vedişêre

Ji tîrsa qêrînan, heyva ku paçan diêxe
 guhên xwe
 Da ku nebihîse û ji textê xwe nehê xwar.
 Lê, ne xeme gava ku tu dûr herî
 Ez dê bang bikim: dê were
 Wek zîvê heyvekê li rûyê asmanî
 Kofî û xencera xwe amade bike
 Dê were, bi bejn û bala xwe ya
 kurmancî

Bistire hevîrê xwe
 Sêla xwe li kuçkî bike
 Di talda zinaran de
 Di sîka dîwaran de
 Li ser agirê demî
 Bese, yêdî zikê xelkê dirriya
 Ji nanê cehî û bizilmeyên garisî.